

**FUAFUAGA TATAU MO LE VA'AIA LELEI
O I'A MA FIGOTA**

O LE AFIO'AGA

O

**SAVAIA
LEFAGA**

ASO 06 Setema 2000

SAUNIA:

Pule mamalu a Alii ma Faipule ma tagatanu'u o le afio'aga o SAVAIA faatasi ma le lagolagosua a le Vaega o Faigafaiva a le Matagaluega o Faatoaga ma Faigaf

Fa'atomuaga

O faigafaiva i Samoa e taua tele aua o se tasi lea o auala e maua ai le fofoga taumafa aemaise lava i nu'u ma afio'aga i tua. I le tele o afio'aga, latou te le o fa'atauaina le va'aia lelei o le tamaoaiga ma le si'osi'omaga o le gataifale. O le aumaia ma le fa'aaogaina o ituaiga faigafaiva faa-onapo nei e i ai mea manava, upega/tili mataninii, ma vaila'au 'oona e fa'amata faigofie ai ma tele i'a maua ae o lo o fa'atama'ia ai le si'osi'omaga o le gataifale ma ona tamaoaiga. O le fa'atinoina foi o atina'e i luga o le gataifale ua fa'aleagaina ai le tele o nofoaga ma le miliona o meaola o loo nonofo ma tautuuufua ai. Ina ia fa'asaoina mai lea tulaga, ua fa'atuina ai e le Vaega o Faigafaiva o le Matagaluega o Faatoaga ma Faigafaiva se Polokalame mo le Pulega o le Si'osi'omaga o le Gataifale, ma le Vaa'ia lelei o i'a ma figota, ina ia fesoasoani i le fausiaina o se Pulega faa-faigafaiva i nu'u ma afio'aga e fa'asao, pulea ma fuafua tatau le faaogaina o le tamaoaiga o le gataifale o Samoa.



O se va'aiga matagofie lenei i le afio'aga o Savaia

O lenei fuafuaga o le Pulega o le Si'osi'omaga o le Gataifale ma le Va'aia lelei o i'a ma figota sa saunia e Alii ma Faipule ma tagatanu'u o le afio'aga o Savaia faatasi ma le lagolagosua a le Vaega o Faigafaiva o le Matagaluega o Fa'atoaga ma Faigafaiva.

1 Autu.

O le autu sa fa'atalatalanoaina ma malilie autasi ai vaega e tolu o le Afio'aga o Savaia i taimi o faatalatalanoaga o le ;

Puipuiga o le Siosiomaga o le Gataifale ma le toe faatupulaia o i'a ma figota mo tupulaga ole lumanai.

2 Faamatalaga e uiga i le Afio'aga.

O le Afio'aga o Savaia e i le itu i saute i sisifo o le motu o Upolu ma o lona faitauaofai e tusa ma le 600 aofia ai Matai Tina ma Tamaitai, Aumaga ma tamaiti. E le o aofia ai i latou ua faimalaga atu i atunuu i fafo, e iai Niu Sila, Ausetalia ma le Iunaite Setete o Amerika.

E lua ni tapuaiga i totonu o le Afio'aga o le EFKS ma le METOTISI ae aga'i uma alo ma fanau o le afio'aga i le Aoga Tulagalua i Savaia ma nisi i le Aoga Fa'a-Itumalo a Lefaga .



E tasi lava le ekalesia i totonu o le afio'aga o le EFKS, o le ituala i uta ma tai, e tofi lava ma le falesa. O le aoga tulagalua e aga'i iai le fanau faatasi ai foi ma le aoga faa-itumalo a Lefaga o loo iai foi i le afio'aga mo alo ma fanau a le itumalo atoa.

O Savaia e iai lona aaui e mai lava i le itu i sasae seia paia le itu i sisifo i le mamao pe a mase 500 mita mai le matafaga. O le vaega pito loloto o le aloalo e tusa ma le lima futu i taimi e sua ai le tai ao nisi pito e mago atoa pe a oo ina pe le tai.

O lenei Afio'aga e mamalu tele ona pulega aua e pulea lava e le pule mamalu a Alii ma Faipule o le Afio'aga. O le aumaga e lava saunia i taimi uma aua le tautuaina o matai, o tina latou te avatuina fautuaga i mataupu tau i loto i fale ole Afio'aga.

3 Ituaiga Faigafaiva ta'atele.

E tele ituaiga faigafaiva e mafai ona faatinoina i le aloalo o le afio'aga o Savaia. O nisi o nei ituaiga faigafaiva e i ai matatao, tosotoso, ma le faaaogaina o upega (e tele ina faatinoina e alii) mo le fofoga taumafa a le aiga pe faatau foi. O le aoina ma le eliina o figota i luga o le aau o le galuega patino lava lea i tina ma le fanau mo taumafa a le aiga. O le faatinoina o faigafaiva le talafeagai e i ai fanaia ma 'ava niukini ua matua faasaina lava i lalo o le pulega mamalu a Alii ma Faipule.

O le tele o i'a sa maua i aso ua mavae ua faigata ona maua i aso nei. O i'a o le aloalo e i ai lo, poge/alogo, fuafua/anae ma mataeleele sa tele ma faigofie ona maua i le 30 tausaga talu ai. E oo foi i figota e i ai le faisua ma sea/loli//fugafuga/mama'o ua tele ni itula e faaluina i fagotaga faatoa maua se meaai mo le aiga faatusatusa i le 30 tausaga ua mavae.

4 Tulafono faa-le-nuu e fesootai ma le siosiomaga o le gataifale o Savaia.

O Savaia e i ai ona tulafono e faasaina ai faigafaiva le talafeagai ona faatinoina i o latou gataifale. I le taimi nei ua matua faamallosia foi le tulafono e faasaina ai tagata mai isi afio'aga (i tua atu o Lefaga) ona toe fagotaina gataifale o lenei afio'aga sei vagana ua feutaga'i muamua ma le Komiti Faufautua mo le Vaaia o i'a ma figota (KFVL).

5 Tapenaga o lenei Fuafuaga Tatau

O lenei tapenaga sa saunia lava e le pule mamalu a Alii ma Faipule, ma tagatanuu o le afio'aga o Savaia faatasi ai ma ni fautuaga ma le lagolagosua a le Vaega o Faigafaiva a le Matagaluega o Faatoaga ma Faigafaiva. O se ootoga lenei i le tapenaga o lenei Fuafuaga ina ua maea ni fonotaga sa faia ua taua i lalo.

5.1 Feiloaiga muamua ma le uluai fono ma le afio'aga.

I le amataga mai o le polokalame, sa faapea ona sailia e le Ofisa se finagalo o le Pule Mamalu a Alii ma Faipule e faatatau i le plokalamame mo le puipuia o le Gataifale. O le Aso Lulu 16 Novema 2005 sa faia ai se feiloaiga muamua (fono) a le Ofisa ma le afio'aga e faamalamalama ai le polokalame mo le taliaina e le afio'aga. O le fono foi lenei sa auai ai le Pule Sili Lagolago, Alii ma Tamaitai Ofisa e taliaina aloaia ai se finagalo o le afio'aga i le polokalame. O le maea o lenei feiloaiga muamua na taliaina lelei ai e le Afio'aga le Polokalame, ma filifili ai le Aso Faraile 25 Novema 2005 mo faatalatalanoaga ma vaega e tolu o le afio'aga e aofia ai Alii ma Faipule, Komiti a Tina ma Tamaitai ma le Aumaga.



Ata o le fono muamua ma le afio'aga

5.2 Faatalatalanoaga i Vaega e tolu

O le taua o leni faatalatalanoaga ina ia vaevaeina le afio'aga i vaega e iai le pule mamalu a Alii ma Faipule, Komiti a Tina ma Tamaitai ma Aumaga. O nei vaega e tolu sa faatalatalanoaina e sui o le Vaega o Faigafaiva. O le autu tonu o nei faatalatalanoaga ina ia mafai e le afio'aga ona faailoa mai faafitauli o lo o alia'e mai le siosiomaga o lo latou gataifale, ma sailia ai ni aafiaga ma ni mafuaaga o nei faafitauli, aemaise o ni fofo, faatinoga ma i latou e faatinoina nei fofo ua ta'ua. O leni faatalatalanoaga sa faia i le Aso Faraile 25 Novema 2005.



Ata: Vaega e tolu o le Afio'aga.

5.3 Komiti Faufautua mo le vaaia lelei o i'a ma figota (KFVL)

O le matafaioi a lenei Komiti o le tuufaatasia lea o faamaumauga ma faamatalaga mai vaega taitasi ma sa mafai ona latou tapenaina se ata faataitai o le Pulega o le Siosiomaga o le Gataifale ma le Vaaia Lelei o i'a ma figota.



Ata o le Komiti mo le Va'aia lelei o i'a ma figota

6 Pasiaina o le Fuafuaga Tatau mo le Vaaia Lelei o I'a ma Figota.

6.1 Fuafuaga Tatau mo le Vaaia Lelei o i'a ma figota ma le tauaofiaga o le Fono Mulimuli.

O le faagasologa atoa o lenei fuafuaga ua tamaaina lea i totonu o le Fuafuaga Tatau mo le Vaaia Lelei o i'a ma figota. O lenei fuafuaga o se maliliega i le va o le afio'aga ma le Malo ua tamaaina ai fuafuaga faataatitia o le afio'aga e aofia ai foi ma fuafuaga faataatitia e lagolagosua mai ai le Vaega o Faigafaiva. O lenei fuafuaga sa tuuina aloaia ile fono e sui o le KFVL a'o loo auai ai foi sui o le Pulega a le Vaega o Faigafaiva, e faailoa ai le taua o lenei fono. O le pasiaina o lenei fuafuaga e mafai ai e le Afio'aga ma le Vaega o Faigafaiva ona faatinoina galuega ma fuafuaga ua faataatitia. O le fono foi lea e filifilia ai se komiti e taitaia le faagaioiga o fuafuaga ua uma ona faataatitia.

6.2 Filifilia o le Komiti mo le Pulea ma le Faamalosia o Fuafuaga.

O le Komiti mo le vaaia lelei o i'a ma figota sa filifilia e le fono, latou te mata'ituina fuafuaga faataatitia a le Afio'aga. O le maea o le pasia o le fuafuaga tatau ma ua lelei atoatoa o le a fa'afeso'ota'i lava e le Vaega o Faigafaiva le Komiti mo le Vaaia lelei o i'a ma figota i tulaga uma lava e manaomia ai le fesoasoani e pei ona autasi ma tamaaina i le fuafuaga tatau.

7 Fuafuaga Faataatitia.

O fuafuaga faataatitia o ni gaoiga ua faamoemoe e faaono foia ai faafitauli ua faaalua mai e vaega eseese o le Afio'aga. E lua (2) ituaiga fuafuaga faataatitia ua fuafuaina ma o le fuafuaga ua aupito sili ona taua o fuafuaga faataatitia lea ua faaagaga mo nuu poo afio'aga. O le isi vaega o fuafuaga faataatitia ua faamoemoe lea mo le Vaega o Faigafaiva ma o lenei fuafuaga o le a tuuina atu ai fautuaga ma fesoasoani aua le tapenaina o le faamoemoe e faatino ai fuafuaga faataatitia mo le Vaega o Faigafaiva e ao ona faamaonia e le Pule Sili Lagolago a le Vaega o Faigafaiva a le Matagaluega o Faatoaga ma Faigafaiva.

I taimi o faatalatalanoaga i vaega taitasi e tele ni mafuaaga sa fa'aailoa mai ae auga lava i le faafitauli ogaoga o le faaitiitia lea o i'a ma figota i le aloalo ma aua o le Afio'aga o Savaia. O mafuaaga ma o latou aafiaga i le siosiomaga o le gataifale sa faapea ona iloiloaina ma sailia ai ma le tali o le faafitauli ma fofo e foi'a ai. E le gata i lea sa faailoa mai ai foi ma i latou e faatinoina nei galuega.

7.1 “Faamalosi Tulafono faale nuu e faasaina ai faigafaiva le talafeagai e pei o fanai'a ava niu kini ma vailaau oona”.

Otootoga

Na faaalua e vaega taitasi i taimi o faatalatalanoaga o loo fa'aauuina pea le faaaogaina e faifaiva o fanai'a, ava niukini ma vailaau o'ona i fagotaga. O nei faigafaiva le talafeagai ua maunoina lo latou tulaga ogaoga i le faatamaiaina o le siosiomaga o le gataifale e pei o i'a laiti aemaise o nofoaga taua mo meaola o le sami e iai amu. O le faaleagaina o le gataifale mai nei auala faafaigafaiva e umi ma tele se taimi e toe faafoi ai i le lelei sa iai.

Fuafuaga faataatitia a le Afio'aga.

Talu ai ona o le tulaga pagatia ua iai le Gataifale o lenei Afio'aga o Savaia o lea ua a'e ai se finagalo autasi i le Komiti ua filifilia ina ia matua faamalosi loa tulafono a le Afio'aga e faasaina ai faigafaiva le talafeagai e pei o fanai'a, ava niu kini ma vailaau oona. O le puipuiga ma le faamamaluina o nei tulafono o le a i aao lava o le pule mamalu a Alii ma Faipule faatasi ai ma le lagolagosua a tagata nuu o le afio'aga.

Fautuaga:

Ia toe faamalosi ma faamamaluina tulafono ua taua i lalo a le Afio'aga mo le faasaina o faigafaiva le talafeagai.

Tulafono:

Mo le mamalu ole atunuu faatasi ai ma tagata nuu o Savaia – Ua matua faasaina lava faigafaiva le talafeagai e pei o fanai'a, ava niu kini, ma vailaau oona ona toe faatinoina i gataifale poo le nofoaga faasaina a lenei afio'aga. O le puipuiga ma le faamamaluina o nei tulafono o le a i aao o le pule mamalu a Alii ma Faipule faatasi ai ma le lagolagosua a tagata o le Afio'aga.

Faasalaga:

So'o se tasi o le afio'aga poo tagata mai isi afio'aga e solia lenei tulafono o le a faasalaina i faasalaga faa-le-nuu, a le utagia o le a molia sa'o i le Tulafono o Faigafaiva a le Malo Samoa.

Fuafuaga faataatitia a le Vaega o Faigafaiva.

O le a fesoasoani le Vaega o Faigafaiva mo le faatinoina o fuafuaga faataatitia a le Afio'aga e ala atu i lana polokalame fesoasoani i aoaoga tau faigafaiva.

7.2 Ia faasaina faigafaiva mai isi Afio'aga.**Otootoga**

O fagotaga mai isi nuu e faaogaina ai faigafaiva le talafeagai, e iai ava niu kini, fanaia, vailaau oona, fa'amo'a ma tu'iga, ua mautinoa le matua faaleagaina ai o le gataifale. E le gata i lea, o le faaopoopoina lea o le numera o tautai latou te fagotaina gataifale o le afio'aga ma oo ai i se tulaga e faaitiitia ai i'a ma figota maua.

Fuafuaga faataatitia a le Afio'aga

Ua faaalina mai e le komiti (KFVL) le tatau ona faia o se tulafono e faasa ai faigafaiva e pei o le faaogaina o faigafaiva le talafeagai. O le autu moni o lenei tulafono ona o nisi o tagata mai isi afio'aga o loo latou faatinoina faigafaiva i gataifale ma faatamaia ai. O lea ua faia ai se tulafono ma ona aiaiga mo le mamalu o le atunuu lautele aemaise i latou e i fafo atu o le itumalo o Lefaga.

Tulafono:

"Ua matua faasaina lava tagata mai fafo atu o le Itumalo o Lefaga ona toe fagotaina gataifale o Savaia sei vagana ua feutaga'i ma le Komiti (KFVL) ma le Afio'aga.

Faasalaga:

O i latou e le usitaia lenei tulafono o le a molia sa'o i le Tulafono o Faigafaiva a le Malo o Samoa.

Fuafuaga faataatitia a le Vaega o Faigafaiva

O le a fesoasoani mai le Ofisa mo le faamalositia ma le faamautuina o lenei tulafono.

7.3 Ia faasaina ona toe fagotaina mai i'a ma figota laiti.**Otootoga**

O le fuafua tatau o le fagotaina mai o i'a ma figota o se itu lelei tele ma talafeagai lea mo le faasaoina ma le toe faatupulaia o meaola o le gataifale. O lenei fuafuaga o le a mafai ona maua ai le avanoa e i'a ma figota laiti e tutupu ma fanafanau ai, i le uluai taimi ao lei aveeseina pe fagotaina mai foi. Afai e fagotaina mai se i'a po'o se figota ae lei o'o i le lapopo'a (matua) e fanafanau ai, o lona uiga ua leai sona sao mo le isi augatupulaga e soso'o ai. Afai la o le a faaauau ai pea lea tulaga, o lona uiga, o le a saga faaitiitia pea le faitauaofai o i'a ma figota ma faasolo lava ina mou malie ese atu.

Fuafuaga faataatitia a le Afio’aga

Ua faaalua e le afio’aga lo latou lagolagoina o le Tulafono o Faigafaiva ua pasiaina nei o loo aiaia ai fua faatapulaa o le laiti o i’a ma figota e tatau ona fagotaina. Na taua foi o le faamalosia o lenei tulafono o le a iai pea lea i le pule mamalu a Alii ma Faipule faapea le Afioaga i le Pulenuu ma le Komiti. Ua lagolagoina foi e le afio’aga le pepa o faamatalaga o loo faaalua ai fua faatapulaa o le laiti o i’a ma figota e fai ma taiala.

Tulafono:

“Ua matua faasaina ona toe fagotaina i’a ma figota laiti mai le gataifale o Savaia e pei ona fa’aalia i le Tulafono fa’atonutonu o Faigafaiva a le Malo o Samoa”

Faasalaga:

“So’o se tasi e le usitaia lenei tulafono o le a molia sa’o i le Tulafono o Faigafaiva a le Malo o Samoa”

Fuafuaga a le Ofisa o Faigafaiva.

O le a fesoasoani le Ofisa mo le tapenaina o Tulafono o Faigafaiva mo fua faatapulaa o i’a ma figota aemaise pepa o faamatalaga e faamalamalama ai le puipuiga o le fagotaina o i’a ma figota laiti.

7.4 Ia faamalosia tulafono e faasaina ai tu’iga ma fa’amo’a.

Otootoga

O amu ua maitauina lona taua i le siosiomaga o le gataifale ona ua mautinoa ua avea lea ma nofoaga o figota ma i’a faapea ma isi meaola o le sami. Afai o le a faatamaiaina amu o lona uiga, ua afaina foi le tele o meaola o loo nonofo ai. O tu’iga poo fa’amo’a o se tasi lea o faigafaiva e le talafeagai ua matua faaleagaina ai amu aemaise i’a ma figota laiti. Afai ae faaaauina pea nei ituaiga faigafaiva o lona uiga o le a sili atu ona tele se afaina o amu o loo fai ma ofaga ma nofoaga o i’a ma figota o le gataifale.

Fuafuaga faataatitia a le Afio’aga

Na faaalua e vaega taitasi o le Afio’aga e ui lava Ina le toe vaaia lenei ituaiga o faigafaiva, peitai e tatau lava ona faia se tulafono e faasaina ai tu’iga ma fa’amo’a i gataifale o Savaia. O nei manatu faaalua sa matua lagolagoina e le komiti ma aiaia ai loa le tulafono e pei ona taua i lalo:

Tulafono:

“Ua matua faasaina ona toe faatinoina faigafaiva e pei o tu’iga ma fa’amo’a i gataifale o Savaia”

Faasalaga:

“Soo se tasi e le usitaia lenei tulafono o le a faia loa iai faasalaga faa-le-nuu e le Komiti. A le utagia lenei fuafuaga o le a molia loa i le Tulafono o Faigafaiva a le Malo o Samoa”

Fuafuaga faataatitia a le Ofisa o Faigafaiva.

O le a fesoasoani le Vaega o Faigafaiva mo le faamautuina ma le faamalosia o lenei tulafono. O le a mafai foi ona tuuina atu ni pepa o faamatalaga e uiga i mea uma ua taua. E lagolagoina foi e le Ofisa soo se fuafuaga a le Afio'aga ua talafeagai lelei ma le tulafono mo le faasaoina o amu.

7.5 Ia faasaina ona toe Lafoa'i lapisi e pei o uamea, atigi apa pepa iila ma isi ituaiga i le sami ma le matafaga.

Otootoga

O lapisi lafoai i le sami ma matafaga e avea ma ala e faamanualia ai aao o le aufaifaiva. E le gata i lea o le faaleagaina ai o le siosiomaga o le gataifale ma faatamaia ai nofoaga mo meaola o le sami. E le talafeagai foi i le silasila a le afio'aga poo tagata tafafao mai se matafaga e lafoai ai nei ituaiga o lapisi.

Fuafuaga faataatitia a le Afio'aga

O le a faamalosia e le Afio'aga fuafuaga ma aiaiga e faasaina ai ona toe lafoai lapisi e pei ona taua i luga i le matafaga ma le sami. Ua saunia foi e le Afio'aga fata lapisi ma lagolagoina polokalame a le malo o loo aoina ai lapisi.

Tulafono:

“Ua matua faasaina soo se tasi ona toe lafo' ai soo se ituaiga o lapisi i le matafaga ma le sami”

Faasalaga:

“Soo se tasi e le usitaia lenei tulafono o le a faasalaina i le \$20.00.

Fuafuaga faataatitia a le Ofisa o Faigafaiva

O faamatalaga eseese e faatatau i aafiaga o le siosiomaga o le gataifale ma ona tamaoiga o le a fesoasoani atu ai le Ofisa o Faigafaiva e aotauina ai le afio'aga i le taua o le teu maluina o lapisi ma otaota i nofoaga talafeagai. O le a faia foi se polokalame i le televise e falauiloa atili ai le taua o le siosiomaga mama.

7.6 Ia aoina ma faatamaia alamea

Otootoga

O le alamea o se meaola o le ituaiga o le aveau ma e nofo i luga o le aau. O lenei meaola e na te aiina meaola ninii ua taua o polipe o loo tutupu mai ai amu. A oo ina faateleina lenei meaola o le a faaapena ona latou faatamaia se vaega tele o le aau ma avea ai o se tulaga pagatia o le a feagai ma le tele o meaola o loo faalagolago i le aau mo nofoaga ma meaai. E le mafai ona faaumatia pe tapeina le alamea i le vaevaeina o lona tino aua e mafai e nei itutino ona faatupuina mai ai nisi alamea fou, seia vagana lava ua aumaia i uta i le pa'umatu e faamagoina ai pe tanumia foi.

Fuafuaga faataatitia a le Afio'aga.

Ua faailoa mai e le Afio'aga o le alamea o se tasi lea o faafitauli o loo iai i le gataifale. E le gata i le faatamaia ai o amu ae aafia ai foi le soifua o tagata faifaiva, ma ua tuuina atu ai faafautuaga e le Komiti faafautuaga mo le Vaaia lelei o i'a ma figota (KFVL) ia fautuaga e pei ona taua.

Fautuaga

Ua fautuaina e le Komiti (KFVL) le mamalu o le autautai o le afio'aga ina ia aoina i uta alamea ma faalala i le paumatu pe tanumia foi pe a vaaia i taimi i fagotaga. E mafai foi ona avea ose faalelei eleele i togalaau.

Fuafuaga faataatitia a le Ofisa o Faigafaiva

E leai se polokalame a le malo ua fuafuaina e totogi ai le faatamaia o le alamea vagana ai ni fautuaga e fesoasoani atu ai le Ofisa o Faigafaiva i auala talafeagai e tineia ai leni meaola faalafua e ala atu i pepa o Faamatalaga ua maea ona saunia.

7.7 Ogasami Faasoina

Otootoga

Sa faaalua e le Afio'aga o le vave faatupulaia o le tamaoiga o le avea lea ose vaega o le gataifale ma vaega faasao, e vave ai ona toe faatupulaia le faitauaofai o i'a ma figota. O leni vaega faasao o le a faasoina ai amu 'aau faapea foi i'a ma figota ina ia mafai ona maua e nei meaola le avanoa e tautuufua ma fanafanau ai. O le autu taua lava o le a avea leni faasao ma punaaga o i'a ma figota e mafai ai ona fa'aleleia nisi o vaega o le gataifale ua afaina. O le a fanafanau ma tautu'ufua i'a ma figota o lo o aumau i le vaega fa'asoina ma tafea atu o latou fua fanau ma fa'atupuina ai, nisi meaola fou i nofoaga ua le maua ai ni i'a ma figota. O le a le pine ona manuia ai i tatou ae fa'apea foi tupulaga o le lumana'i.

Fuafuaga faataatitia a le Afio'aga

O le afio'aga o le a latou filifilia se vaega o le gataifale e fa'atinoina ai le vaega fa'asoina. O le a latou fausiaina foi tulafono e fa'asaina ai ni faigafaiva ona fa'atinoina i lea vaega. O le afio'aga foi latou te mata'ituina ma faamalosi tulafono a le afio'aga.

Tulafono:

Ua matua faasaina lava ona toe faatinoina soo se ituaiga faigafaiva, tagata ta'eele, solia pe uia/kolosi foi e ni va'a fagota po o se isi lava ituaiga vaa i totonu o leni vaega o le gataifale o le a faasoina. O i latou e fia maimoa i le nofoaga fa'asoina e ao ona fa'afeso'ota'i le Komiti mo se faatagana.

Faasalaga:

O le solia o leni tulafono e so'o se tagata o le a faasalaina i le \$100.00. A le usitaia leni faasalaga o le a molia sa'o i le Tulafono o Faigafaiva a le Malo o Samoa.

Fuafuaga faataatitia a le Vaega o Faigafaiva:

O le a fesoasoani atu le Ofisa i le faatinoina o le iloiloga o le tulaga talafeagai o le gataifale mo se nofoaga faasao. E le gata i lea a o le tu'uina atu o fautuaga ma faamatalaga mo le tausiga, pulea ma le va'aia o le nofoaga faasao o le gataifale o le afio'aga. E fesoasoani atu foi le Ofisa i le tapenaina o tulafono e puipuia ai le nofoaga faasao.

7.8 *Ia iloiloina tulaga talafeagai o le faasao o se vaega o le gataifale ole afio'aga*

Otootoga

O se vaega o le gataifale ua faasao e tatau ona le toe aafia ai ni faigafaiva. O le avea o se vaega o le gataifale ma nofoaga faasao, e mafai ona malu puipuia ai le siosiomaga o le gataifale ma ona tamaoaiga i figota ma i'a aemaise o 'amu. O lenei nofoaga faasao o le a faasao ai amu, 'aau, figota faapea foi ma i'a ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea lenei faasao ma punaaga o i'a ma figota e mafai ai ona toe faaleleia nisi vaega o le gataifale ua afaina. E le gata i lea o le a fanafanau ma tautuufua i'a ma figota o loo aumau i le nofoaga faasao ma tafea atu o latou fua fanau ma faatupuina ai nisi meaola fou i nofoaga ua le maua ai nei i'a ma figota. O le a le pine ona manuia ai i tatou ae faapea foi tupulaga o le lumanai.

Fuafuaga faataatitia ale Afio'aga

O le afio'aga e ao ona:

- Galulue faatasi ma lagolagosua i le afaigaluega a le Vaega o Faigafaiva, i le faatinoina o le iloiloga o le tulaga talafeagai o se vaega o lona gataifale, e avea ma nofoaga faasao.
- Talanoaina ma auiliiliina le lipoti ma ia faia se faaiuga i le faavaeina o le nofoaga faasao.
- Saunia faailoilo e pei o laau, pole poo nisi lava faiga talafeagai mo le faailogaina o le vaega ua faamautuina ma pasiaina.

Afai ae finagalo le fono i se tasi, poo fuafuaga uma ua taua:

- Ia faatinoina loa fuafuaga mo le faavaeina o le nofoaga faasao e pei o le mataituina, tausiga ma le vaaia lelei o se vaega ua atofaina.

Fuafuaga Faataatitia a le Vaega o Faigafaiva

O le Vaega o Faigafaiva o le a:

- Faatinoina le suesueina o se vaega o le gataifale e avea ma nofoaga faasao.
- Saunia le lipoti mo le tuuina aloaia atu i le Komiti mo le Vaaia lelei o i'a ma figota (KFVL) ma le Fono a le afio'aga.

Afai ae finagalo le fono i se tasi, poo fuafuaga uma ua taua

- Pe a tusa ai, o le a tuuina atu ni fautuaga ma ni faamatalaga mo le tausiga, pulea ma le vaaia o le nofoaga faasao o le gataifale o le afio'aga.

7.9 Ia iloilo ina tulaga talafeagai o le (i) Gataifale ma le (ii) Vai o le Afio'ga, mo le Tufaina atu ma le Faatoagaina o figota ma i'a.

Otootoga

O le tufaina atu ua faatatau lea i le talafeagai o vaega moomia mo le faaolaina o i'a ma figota.

O nisi nei o atinae mo le faatupuina o figota ma i'a aua le fofoga taumafa mo le afio'aga. O nei auala faa-atinae e moomia ai lava le galulue filiga ma le faamaoni o le afio'aga ina ia ausia se taunuuga lelei.

Faamatalaga faaopo'opo - Tufaina o figota/i'a

O le tufaina atu ua faatatauina lea i le aumaia o ni figota/i'a mai se isi atunuu e faaolaina i se ogasami/vai ua talafeagai lelei. O le tufaina o le figota o le aliao i le tele o atunuu o le Pasefika ua mautinoa ai le tele o ni faamanuiaga na mafai ona seleseleina e nei atunuu.

I Fiti ua tele ina faaogaina ma toomaga iai tagata i le aano o le aliao e avea ma mea taumafa. O lona atigi na mafai ona faatauina atu e gaosi ai faamau o ofu i fale gaosi oloa. I le Atu Kuki e tusa ma le 280 aliao na tufaina atu iai ma na mafai ona maua mai ai se aofaiga e tusa ma le 200 tone o atigi aliao i le tausaga na faatauina i fale gaosi faamau.

I le 1990 na tufaina atu ai i sami o le motu o Namu'a i Aleipata le 40 o aliao ma e le o mai iloa tonu le tulaga ua oo iai nei aliao. I le taimi nei o loo iai taumafaiga a le Vaega o Faigafaiva i le faafofoaina o faisua, tuitui (tapumiti) ma aliao, mo le faa-faatoagaina i gataifale o Samoa. O nei figota ua mautinoa lo latou faaitiitia talu ai o le soona fagotaina e le gata i lea o faigafaiva le talafeagai ma mala faa-le-natura ua faatamaia ai o latou nofoaga. O le faamoemoe la o lena taumafaiga o le faa-faatoagaina lea o nei figota i vaega o le gataifale.

Fuafuaga Faataatitia a le Afio'aga

E ao i le afio'aga ona:

- Galulue faatasi ma le Vaega o Faigafaiva i le faatinoga o le iloilo pe talafeagai ma lelei le gataifale ma le vai i le tufaina atu ma le faa-faatoagaina o figota/i'a
- Auiliiliina o le lipoti i suesuega o le talafeagai o le gataifale ma le vai, ma ia faia se faaiuga i le faatinoina o nei atinae i totonu o Savaia
- Galulue faatasi mo le puipuia o nei atinae ma le va'aia o tagata o lo'o latou faatamaia ma solia tulafono e faatatau i nei atina'e.

Fuafuaga Faataatitia a le Ofisa o Faigafaiva:

O le a faatinoina ni su'esu'ega i le gataifale ma le vai o le afio'aga ina ia faamaonia le talafeagai mo le faaolaina ai o figota/i'a. O le a mafai ona tuuina atu ni figota/i'a pe afai o le a faamaonia le talafeagai o nei nofoaga mo ia atina'e.

Pe a faataunuina lenei fuafuaga, o le a:

- Fesoasoani mai le Ofisa e ala lea i le va'aia ma le mata'ituina o le sologa lelei o le tuputupu a'e o figota/i'a ua atina'eina.
- Saunia ni aoaga mo le faamalamalamaina o olaga faanatura ma le tausiga o nei figota/i'a

7.10 Ia fa'aaogaina le Mana o Talosaga!

Otootoga

O talosaga ma talitonuga tuufaatasi faa-le-lotu, o se tasi lea o faamoemoega ua talitonuina lona taua aua le puipuia ma le faasaogalemuina o le gataifale ma ona tamaoaiga aemaise o lona siosiomaga.

Fuafuaga Faataatitia a le Afio'aga

O le sao taua o le au-failotu, o le unaia lea ma faamalosiau i tagatanuu ina ia latou faatauaina le puipuia ma le faasaoina o le gataifale ma ona tamaoaiga.

O le tuufaatasia o finagalo o tagata ina ia galulue faatasi e foia ai foi faafitauli o loo alia'e mai i le gataifale. Ua lagolagoina foi e le Komiti lenei fautuaga ma fautuaina ai le galulue faatasi o le aufailotu ma le mamalu o le afio'aga.

Fuafuaga faataatitia a le Ofisa o faigafaiva

O le a mafai ona tuuina atu ni fesoasoani mai le Ofisa mo le mamalu o le au-fai lotu e ala i pepa o Faamatalaga ma Tautalaga ina ia fesoasoani i le tapenaina o a latou lauga ma aoaga mo le puipuia ma le faasaoina o le siosiomaga o le gataifale ma ona tamaoaiga.

7.11 Talosaga:

O nei talosaga sa mafai ona tuuina mai e sui ole afio'aga sa auai i fonotaga ma le Vaega o Faigafaiva i taimi o faatalatalanoaga i vaega e tolu. O talosaga uma foi la ua tuuina mai sa faamautuina e le Komiti (KFVL) i le latou fonotaga ma le Ofisa. Pe a talafeagai ai, o nei talosaga o le a mafai ona iloiloina e le (KFVL) i le latou fonotaga ma le Vaega o Faigafaiva mo le faataunuina pe a mae'a le taliaina o lenei tusi e le pule mamalu a Alii ma Faipule i le Fono tele e faia i le aso O talosaga uma sa tuuina mai o loo faailoa atu i lalo;

- (a). Faisua
- (e). Ogasami faasao mo i'a ma figota.
- (i). Aliao.
- (o) isi figota
- (u) totoina o le amu

7.12 Maliliega:

Ua i ai le maliliega o le a galulue so'oso'o tauau uma vaega i le puipuiga o le siosiomaga o le gataifale mo le manuia o tagatanuu o le afio'aga aemaise o tupulaga o le lumanai. O lea manuia e mafai ona maua pe a faatinoina uma fuafuaga faataatitia ua tamauina i Fuafuaga Tatau mo le Pulea ma le Vaaia lelei o i'a ma figota o le afio'aga.

7.13 Toe iloiloina o lenei Fuafuaga Tatau

Otootoga

O le toe iloiloina o lenei Fuafuaga Tatau o le Vaaia Lelei o i'a ma figota o le afio'aga e sailia ai le agai i luma o le polokalame i totonu o nuu ma afio'aga, aemaise se auiliiliga maumaututu i le tulai mai o galuega fai a le afio'aga ma le Vaega o Faigafaiva i le faataunuaina o Fuafuaga Faataatitia e pei ona taua i luga. O lenei foi iloiloga e lipotia ai le alualu lelei ma ni faaletonu i totonu o le Polokalame talu ona faavaeina i totonu o afio'aga. E le gata i lea o ni vaega e fia faia iai ni suiga fou e pei o le toe teuteuina o tulafono ma le faamautuina o matafaioi a itu uma o le polokalame.

Fuafuaga faataatitia a le Afio'aga ma le Ofisa o Faigafaiva

Ua i ai le maliliega a le Komiti (KFVL) a le afio'aga ma le Vaega o Faigafaiva o le a toe auiliiliina lenei Fuafuaga Tatau pe a maea le ono (6) masina talu ona pasia leni tusi i le Fono Tele. O le a feutaga'i lava le Vaega o Faigafaiva ma le Tofi o le afio'aga ma le Komiti i se aso o le a atofaina pe a atoa le ono (6) masina.

7.14 Upu Mulimuli:

O le auai o le afio'aga o Savaia i le Polokalame mo le Pulea ma le Vaaia Lelei o I'a ma Figota ua maunoina le manuia ole afio'aga i ni tausaga o i luma. O le manuia ma le alualu i luma o lenei polokalame e faalagolago tele i le galulue faatasi o le afio'aga; i le Pule Mamalu a Alii ma Faipule, Komiti a Tina, Aumaga aemaise o le Malo e tau ala mai le Vaega o Faigafaiva i le faatinoina o fuafuaga faataatitia ua mae'a soalaupule i le tele o fonotaga ma faatalatalanoaga sa faia.

O lenei polokalame o se galuega e umi se taimi e faaatali ai ni tali faaaliali ma sona lelei, o lea e taua ai mo le silafia e tagatanuu o le afio'aga. O i latou o le a talisapaia ma 'ae'ae i nei manuia o tupulaga o le lumanai o le afio'aga. O lea ua a'e ai se tofa i le Afio'aga e faia se polokalame fa'apenei a le Malo e fesoasoani ai e toe tapu'e mai le sosia o le tamaoai o le gataifale o le afio'aga ua tauau ina mou atu.

Faamatalaga e uiga i le afio'aga.

8 Faamatalaga 1 - Faamatalaga e uiga i le afio'aga o SAVAIA.

1. Faitau aofai o tagata.

Aofaiga o matai	35
Aofaiga o aumaga	63
Aofaiga o faletua, tausi , aualuma	81
Aofaiga o tamaiti,	toatele

2. Ituaiga o Ekalesia

- ✓ EFKS
- ✓ Metotisi

3. Aoga

- ✓ Tulaga lua

4. Siosiomaga o le gataifale.

- Umi o le aau
400-500mita
- Mamao o le aau ma le matafaga
500mita
- Loloto o le vaega aupito sili ona loloto o le aloalo pe a pe le tai
10-12 futu
- Loloto o le vaega aupito sili ona loloto o le aloalo pe a sua le tai
sili atu i le 15 futu
- Papa'u o le vaega aupito sili ona papa'u o le aloalo pe a pe le tai
aliali uma pe a pe le tai
- Papa'u o le vaega aupito sili ona papa'u o le aloalo pe a sua le tai
5-6 futu

5. Nisi Faamatalaga

- Toatele o le afio'aga ua aumau i atunu'u mamao
- Maopopo faiganu'u i Alii ma Faipule, Aumaga ma le Komiti a Tina ma Tamaita'i

9 Faamatalaga 2: Ituaiga Faigafaiva e fa'atinoina i aso uma

Ituaiga	Taimi fa'aalu (tasi/ova ma le tasi le aso i le vaiaso)	O ai e masani ona fa'atinoina nei faigafaiva			O le fa'aaogaina o i'a/figota maua		
		Ali'i	Tama'ita'i	Tamaiti	'Aiga	Fa'atau	'Aiga/Fa'atau
Maulu & matatao	1-2 itula	X					X
Ofe	1-2 itula	X			X		
Pa i'a/Upega	1-2 itula	X					X
Aoina o figota	4-5 itula		X	X			X
Nisi Fa'amatalaga							
<ul style="list-style-type: none"> ❖ Faigafaiva ua fa'asaina – 'ava niukini, fanai'a, tu'iga/fa'amo'a, tane mauulu ❖ Fa'asaina foi tagata mai isi afio'aga ona fagotaina gataifale o Savaia se'i vagana ua feutaga'i ma le Komiti (KFVL). 							

10 Fa'amatalaga 3: I'a ma Figota.

Ituaiga i'a	Ituaiga faigafaiva	Taimi fa'aalu i fagotaga	
		Taimi nei	30 tausaga
Lo	Upega/pa i'a	2-3 itula	1 itula
Pone	Maulu/matatao	2-3 itula	1 itula
Mata'elele	Upega/ pa i'a	1 itula	1 itula
Ta'uileia	Maulu/matatao	2-3 itula	1 ½ itula
Malau	Maulu/matatao	2-3 itula	1 ½ itula
Lalafi	Maulu/matatao	2-3 itula	1 ½ itula
Fugausi	Maulu/matatao	2-3 itula	1 ½ itula
Ituaiga figota			
Alili lapo'a	Ao	Aso atoa	2-3 itula
Faisua	Maulu/ao	Aso atoa	2-3 itula
sea	Ao	Aso atoa	1-2 itula
Tuitui	Maulu/ao	1 itula	½ itula
vaga	Maulu/ao	1 itula	½ itula

Nisi fa'amatalaga:

- ❖ **Nofoaga fa'asao:** e le'i amataina

11 Fa'amatalaga 4: Tulafono a le Afio'aga i le puipuiga o le gataifale

O tulafono ua taua i lalo ua mata'ituina e le afio'aga mo le puipuiga o tamaoaiga ma le siosiomaga o le gataifale.

1. Ituaiga faigafaiva ua fa'asa ona toe fa'atinoina i gataifale o Savaia
 - ❖ 'ava niukini
 - ❖ Fanai'a
 - ❖ Vailaau Oona
2. O tagata faifaiva mai isi afio'aga e fia faia ni fagotaga i gataifale o le afio'aga o Savaia e tatau ona fa'afeso'ota'i le Komiti mo le Vaaia lelei o i'a ma figota (KFVL) a le afio'aga.

12 Fa'amatalaga 5: Fa'amatalaga ma fa'amaumauga sa aoina i taimi o fa'atalatalanoaga i vaega e 3.

Ta'ita'i fa'atalatalanoaga: Talavou/Kaisara/Aa
Tusia fa'amaumauga: Ulusapeti/Susau/Vaofusi/Mataitusi
Aso na faia ai: 25/11/2005

AUTU: "PUIPUIGA O LE SI'OSI'OMAGA O LE GATAIFALE"

'Aafiaga:

- Faaitiitia taumafa sami
- Tele le taimi fa'aalu i fagotaga
- Aafia le soifua maloloina
- Faaitiitia tupe maua mai tau'i'a faatau atu

Faafitauli: Faaitiitia i'a ma figota laiti i gataifale o Savaia

Mafuaaga:

- Tau leai ni amu ola
- Mala faa-natura (matagi/afa/lologa ma isi)
- Faigafaiva le talafeagai (fanai'a/'ava niukini)
- Faiva e pei o fa'amo'a ma upega tu'iga
- Toatele tagata fagogota
- Tele i'a lapopo'a e aia i'a laiti
- Tele alamea e pepe ai 'amu

TALI FA'AFITAU LI: Fa'ateleina i'a ma figota i le gataifale o Savaia

Fofu o Mafuaaga:

- Faateleina o amu ola
- Mana o talosaga e talosia ai le siosiomaga o le gataifale
- Faasa faigafaiva le talafeagai (fanai'a/ava niukini)
- Faasa fa'amo'a ma tu'iga
- Aoina alamea

Fa'atinoga: (E faapefea ona fa'atino?)

- Fa'asao amu e ala i le faia o se Ogasami Fa'asao
- Fa'ailoga se aso mo talosaga ma anapogi
- Faia tulafono e fa'asaina ai faigafaiva le talafeagai
- Faia ni polokalame e unaia ma faamallosia ai faiva i tuaau
- Faia ni fautuaga ina ia aoina mai i uta alameea pe a vaaia i taimi o fagotaga

O ai e faatinoina:

- Pulega a Alii ma Faipule
- Faletua ma Tausi
- Aumaga ma tagatanu'u uma
- Vaega o Faigafaiva (sui o le Malo)

Talosaga a le afio'aga:

- Nofoaga fa'asaoina mo i'a ma figota
- Fa'a-fa'atoagaina o le faisua, 'aliao ma isi figota
- Fa'alateleina le tomai i nisi o agavaa faa-faifaiva

13 Fa'amatalaga 6: Sui o le afio'aga sa auai i faatalatalanoaga

Matai:

Malama Tiitii (Pulenuu)
Tusani Faaloia
Fui Taotofi
Lepale Sootaga
Muaau Vesi
Lelea Kalepo
Leapai Leatiali'i
Taala Mose
Pua Ieremia
Tataio Siaki
Feagai Tafa
Seu Nofoa
Matua Kitona
Muaau Salevao

Lepale Manu
Malama Faafetai
Lepale Tuatau
Pua Ta'a
Li'a Mefi
Malae Uale
Sila Sapati
Matua Pelea
Ala Meki
Tafea Misiki
Pua Lesiate
Faiga Toma
Sa'u Ropati

Komiti a Tina:

Maria Hess	Saili Lepale	Pepe Vui
Fili Pua Ta'a	Faitele Sila Sapati	Siapu Matafa

Aumaga:

Viliamu	Lepa Fui	Tuileva Vesi
Ioritana Fui	Siamani	Malologa Leapai
Meni	Eli Kalepo	Paulo Leapai
Tautofi	Faanee	Eti Lesiate
Tasi	Uaita Lui	Peato
Mika Stowers	Faimafili	Falesiva Matafa
Mokoi Vesi	Mose Aiafi	Samuelu
Luka Tusani	Oliva Pusaloa	Tikeli Taunoa
Nimo Siaki	Tavita	Ropeti Pua Ta'a
Ueese	Iloilo Aiafi	Tanielu Pua Ta'a
Usufono Fui	Suimai Taunoa	Matafa Leituala

Suafa o le Komiti mo le Vaaia lelei o i'a ma figota (KFVL)***Matai:***

Malama Tiitii (Pulenuu)	Lepale Manu
Leapai Kalepo	Leapai Uale
Leapai Leatiali'i	Sila Sapati
Taala Mose	Matua Pelea
Pua Ieremia	Ala Meki
Matua Kitiona	Sa'u Ropati

Komiti a Tina:

Taesali Tuiaisami Eliapo	Faalagilagi Petivia
Siū I'a Tanielu	Noema Matualoto Siaosi

Sui o le Vaega o Faigafaiva a le Matagaluega o Faatoaga ma Faigafaiva a le Malo Samoa

Ueta Fa'asili	Faatonu Lagolago o Faigafaiva
Dr. Michael King	Taitai Polokeki Faigafaiva Polokalame Fesoasoani Ausetalia
Etuati Ropeti	Ofisa Sinia Mauuluga Faigafaiva
Autalavou Taua	Ofisa Sinia Faigafaiva
Jennifer Kallie	Tamaitai Ofisa Faigafaiva (Upolu)
Mauisii Mose	Alii Ofisa mo le Vafealofai ma afioaga
Malwine Lober	Tamaitai Ofisa Faigafaiva
Ulusapeti Tiitii	“
Susau Siolo	Tamaitai ofisa lagolago faigafaiva
Aa Mauletaua	“
Mataitusi Gaumatau	“
Faataui Vaofusi	Alii Ofisa Faigafaiva
Tauvae Su'a	“
Kaisara Liu	Alii Ofisa Lagolago faigafaiva